

Samþykktir (skipulagsskrá) fyrir Markaðsstofu Kópavogs ses.

1.gr.

Félagið er sjálfseignarstofnun og er nafn þess Markaðsstofa Kópavogs ses.

Heimilisfang:

2. gr.

Heimilisfang Markaðsstofu Kópavogs ses. er að Fannborg 2, Kópavogi.

Tilgangur:

3. gr.

Tilgangur stofnunarinnar er að efla atvinnuþróun og starfa að ferða- og markaðsmálum í Kópavogi með sérstakri áherslu á að auka atvinnustarfsemi innan marka sveitarfélagsins. Tilgangur félagsins er að efla samstarf atvinnulífsins, sveitarfélagsins og annarra sem vilja stuðla að uppbyggingu innan Kópavogs, í þeim tilgangi að bæta ímynd svæðisins og auka eftirspurn eftir hvers konar þjónustu eða atvinnustarfsemi á svæðinu.

Tilgangur stofnunarinnar er því hvers konar ferða-, markaðs- og kynningarmál til að stuðla að því að byggð og fjölbreytt atvinnu- og búsetuskilyrði verði til staðar á svæðinu öllu.

Stofnandi:

4.gr.

Stofnandi stofnunarinnar er Kópavogsbær.

Stofnfé:

Kópavogsbær, kt. 700169-3759 Kr. 8.000.000,-

5.gr.

Stofnfé stofnunarinnar er kr. 8.000.000,- sem er framlag stofnanda félagsins.

Stofnunin ber ábyrgð á skuldbindingum sínum með öllum eignum sínum og öðrum þeim eignum er hún kann að eignast síðar.
Engin sérréttindi í stofnuninni tilheyra stofnendum hennar.

Tekjur:

6.gr.

Tekjur stofnunarinnar skulu vera:

Framlög stofnanda

Tekjur af auglýsingum

Tekjur af vörum og þjónustu sem stofnunin kann að veita

Vaxtatekjur

Styrkir, gjafir eða önnur framlög sem stofnuninni kunna að berast.

Aðrar tekjur

Stjórn:

7.gr.

Stjórn Markaðsstofu Kópavogs ses. skal skipuð sjö mönnum og þremur varamönnum. Stjórnin skal kosin til tveggja ára. Fjórir stjórnarmenn skulu tilnefndir af bæjarstjórn Kópavogsbæjar og þrír skulu kosnir á ársfundi stofnunarinnar.

Peir sem greitt hafa árgjald stofnunarinnar skulu hafa kjörgengi og kosningarétt á ársfundi til stjórnarkjörs, skv. 1. mgr. Eitt atkvæði fylgir hverju greiddu árgjaldi. Skulu þeir þrír einstaklingar sem fá flest greidd atkvæði í kosningu vera réttkjörnir í stjórn.

Tveir varamenn skulu tilnefndir af bæjarstjórn Kópavogs og einn varamaður skal kosinn á ársfundi. Sá aðili sem næstur er inn í stjórn á grundvelli atkvæðafjölda skal teljast rétt kjörinn varamaður skv. 1. mgr. Varamenn taka þannig sæti að við forföll aðalmanns tilnefndum af bæjarstjórn skal fyrsti varamaður taka sæti en annar varamaður ef fyrsti varamaður er einnig forfallaður. Við forföll aðalmanns kosnum á ársfundi skal varamaður kosinn á ársfundi taka sæti.

Stjórnarkjör skal skarast þannig að bæjarstjórn skal tilnefna fjóra fulltrúa þegar ártal ber upp á slétta tölu en ársfundur skal kjósa þrjá fulltrúa þegar ártal ber upp á oddatölu.

Stjórnin skiptir sjálf með sér verkum og velur hún sér formann, varaformann, ritara og gjaldkera. Stjórnin stýrir öllum málefnum stofnunarinnar og kemur fram út á við fyrir hönd hennar. Stjórnin skal sjá til þess að skipulag og starfsemi hennar sé jafnan í réttu og góðu horfi.

Undirskriftir meirihluta stjórnar skuldbinda stofnunina. Stjórn stofnunarinnar getur veitt prókúruumboð fyrir stofnunina.

Stjórnarfundir eru lögmætir ef meirihluti stjórnar sækir fund. Mikilvæga ákvörðun má þó ekki taka án þess að allir stjórnarmenn hafi haft tæk á að fjalla um málið, sé þess nokkur kostur. Afl atkvæða ræður afgreiðslu mála. Halda skal fundargerðarbók um það sem gerist á stjórnarfundum og skulu fundargerðir sendar stofnanda innan viku frá því að fundur var haldinn.

8. gr.

Formaður stjórnar boðar til stjórnarfunda og skal boða fundi með a.m.k. tveggja daga fyrirvara. Hver stjórnarmaður getur krafist stjórnarfunda. Sama rétt á framkvæmdastjóri. Stjórnin skal setja sér starfsreglur þar sem nánar er kveðið á um framkvæmd starfa hennar.

9. gr.

Stjórn stofnunarinnar ræður framkvæmdastjóra og ákveður starfskjör hans. Framkvæmdastjóri ræður annað starfsfólk. Framkvæmdastjóri hefur með höndum stjórn á daglegum rekstri stofnunarinnar og kemur fram fyrir hönd hennar í öllum málum sem varða venjulegan rekstur. Framkvæmdastjóri á rétt til setu á stjórnarfundum þótt hann sé ekki stjórnarmaður.

Framkvæmdastjóra ber að veita stjórnarmönnum og endurskoðendum allar upplýsingar um rekstur stofnunarinnar, sem þeir kunna að óska og veita ber samkvæmt lögum.

10. gr.

Stjórn stofnunarinnar skal velja einn eða fleiri löggilta endurskoðendur (eða endurskoðunarfélög) ásamt varamönnum til að kanna reikninga stofnunarinnar fyrir hvert starfsár. Endurskoðendur má ekki kjósa úr hópi stjórnarmanna eða starfsmanna félagsins

Reikningsárið:

11. gr.

Starfsár og reikningsár er frá 1. janúar til 31. desember. Stjórnin skal hafa lokið gerð ársreiknings og lagt hann fyrir endurskoðendur eigi síðar en 31. mars ár hvert. Ársfund stofnunarinnar skal halda fyrir lok júlí ár hvert. Ársfundur skal boðaður með opinberri auglýsingu með tveggja vikna fyrirvara, þar sem fram kemur dagskrá fundarins.

12. gr.

Hagnaði sem verður af starfsemi stofnunarinnar skal valið til þeirra verkefna er greinir í 3. gr. samþykpta þessara. Þó er stjórn hennar heimilt

að leggja sanngjarna fjárhæð til hliðar til að tryggja fjárhagsstöðu og áframhaldandi rekstur stofnunarinnar.
Hugsanlegt tap af starfsemi stofnunarinnar verður greitt úr sjóðum félagsins eða fært á næsta reikningsár.
Óheimilt er að skuldbinda stofnunina umfram það sem nemur $\frac{3}{4}$ eiginfjár hennar á hverjum tíma.

Breyting samþykkt, slit og sameining:

13. gr.

Heimilt er að breyta samþykktum stofnunarinnar og þarf til þess samþykki allra stjórnarmanna stofnunarinnar á tveimur fundum stjórnar, sem haldnir skulu með minnst einnar viku millibili, svo og samþykki þeirra aðila sem hafa lagt fram minnst $\frac{2}{3}$ hluta þess stofnfjár sem farið er með atkvæði fyrir.
Til að auka skuldbindingar aðila þarf þó samþykki þeirra allra.

14. gr.

Með tillögum um slit og skipti á stofnuninni skal fara sem um breytingar á samþykktum þessum. Komi til þess að stofnunin verði lögð niður skal hrein eign hennar renna til hliðstæðra verkefna og tilgreind eru í 3. gr. eftir nánari ákvörðun stjórnar.

15. gr.

Þar sem ákvæði samþykkt þessara ná ekki til um hvernig með skuli farið, skal hlíta ákvæðum laga um sjálfseignarstofnanir sem stunda atvinnurekstur nr. 33/1999, svo og öðrum lagaákvæðum er við geta átt.

Ákvæði til bráðabirgða

16. gr.

Fyrsta stjórn Markaðsstofu Kópavogs ses. skal skipuð á stofnfundi þannig að bæjarstjórn skipar fjóra stjórnarmenn og kosnir skulu þrjú stjórnarmenn úr hópi þeirra sem sækja stofnfundinn. Á stofnfundi skulu allir fundarmenn hafa kjörgengi og kosningarétt. Skal sú stjórn starfa fram að fyrsta ársfundi stofnunarinnar sem haldinn verður fyrir lok júlí árið 2014. Þá skal bæjarstjórn skipa fjóra stjórnarmenn til tveggja ára, sbr. 7. gr. Á ársfundi árið 2015 skal í fyrsta sinn kosið að nýju þá þrjú stjórnarmenn sem kosnir skulu á ársfundi.

Samþykkt á fundi Markaðsstofu Kópavogs ses. Í Kópavogi, hinn 21. febrúar 2013 – (endurskoðuð 12.12.2015 og samþykkt)